

Petrosay Awali Kágad

Petrosay Awali Kágad

© 2019 Wycliffe Bible Translators, Inc.

Gón Báibalay rajánk kanókén thimay komakká

[Creative Commons Attribution-NonCommercial-NoDerivatives 4.0 International License](#)

Petrosay Awali Kágad

Drud

1 ¹⁻² Cha Issá Masihay kásed Petrosay némagá,
pa hamá sajjahén darándhéhén mardomán ke Pontus, Galátiah, Kápádukiah, Ásiá^a o
Bitiniahay damagán sheng o sháng ant. Hodáyá cha wati péshzánti o gón wati palgár kanókén
Pákén Ruhá, shomárá gechén kortag tán Issá Masihay parmánbardáriá bekanét o hamáiay hón
shomay sará páshag o dranzag bebit.

Hodáy rahmat o sohl o ásudagi shomay sará gésh o géshter bát.

Zendagén omét

³ May Hodáwandén Issá Masihay Hodáén Petá satá o saná bát. Cha wati sarréchén rahmatá o gón
Issá Masihay cha mordagán zendag bayagá, Hodáyá márá nóksará pédá kort tán márá zendagén
omété berasit. ⁴ Áiá pa shomá ásmáná mirásé ambár kortag ke é mirás hechbara napussit, gára
nabit o abadmán ent. ⁵ Shomá Hodáy sará báwar kortag o Hodá ham gón wati zór o wáká pa
hamá rakkénagá shomay negahpániá kant ke tayár ent o áheri zamánagá paddara bit. ⁶ É shomay
shádmáni ent, toré shomá annun pa damánokéá gránén wahd o chakkásán begwázénét, ⁷ tán
shomay báwar sohray paymá bebit ke cha ásay chakkásá gwastag o é mohr o mohkamén báwar, ke
cha zawál bayókén sohr o teláhá báz géshtera karzit, Issá Masihay záher bayagay wahdá satá kanag
o sárháyag o ezzat dayag bebit. ⁸ Shomá Masih hechbar nadistag, angat áiá dósta dárét. Annun ham
shomái nagendét, bale áiay sará báwaró hast o hech labzé shomay porshawkatén wasshiá darshán
korta nakant, ⁹ chiá ke wati báwar o imánay morádá gendagá ét, bezán shomay jánay rakkag.

¹⁰ Paygambarán hamé rakkagay bárawá bázén johlánkén patth o pól kortag. Á paygambarán
hamé rahmatay bárawá péshgoí kortag ke shomárá rasagi at. ¹¹ Masihay Ruh cha áyáni zobáná
habar kanán o gwashán butag ke Masihá chónén sakki saggagi ent o randá áiá chónén mazanén
shán o shawkaté rasit. Gorhá, á modám hamé johdá butagant ke bezánant Pákén Ruh kai bárawá
habará ent o é kár kadéna bit. ¹² Pa áyán paddar butag, hamá wahdá ke habará atant wati hezmatá
nakanagá atant, shomay hezmatá kanagá atant. Nun gón Pákén Ruhay zórá dega mardomán é
wasshén mestág pa shomá raséntag, hamá Pákén Ruh ke cha ásmáná dém dayag butag. Pa é
wasshén mestágay zánagá préshtag ham delmánag ant.

Pák bebét

¹³ Wati lánká bebandét o hozzhár bebét. Zendá pa shehm o rahdári^b begwázénét. Wati ométá pa
Hodáy hamá rahmatán bebandét ke Issá Masih wati záher bayagay wahdá pa shomá rasénitesh.
¹⁴ Habarzurén chokkáni paymá bebét. Maylét ke shomay zend hamá dhawlá sellén wáhagáni dastá
bebit ke shomay názántiay wahdá butag. ¹⁵ Hamá dhawlá ke shomay gwánk janók pák ent, har
káray tahá shomá ham pák bebét. ¹⁶ Chiá ke nebisag butag: “*Man pák án o shomá ham báyad ent pák
bebét*”. ^{c17} Agan shomá Hodáyá wati Peta gwashét, ke á harkasay dadrasíá bé ru o ryá,^d áiay káráni
sará kant, gorhá wati darándhéhiay wahd o pásán pa sharap o ezzat gón Hodátorsi begwázénét.
¹⁸ Shomá zánét ke cha hamá náhudagén zendá ke cha shomay pet o pirénán shomárá rasetagat,
bahá zurag o rakkénag butagét, bale gón nograh o sohrá na, ke abadmán naant, ¹⁹ gón hamá béayb
o békecchahén gwarándh, bezán Masihay bébaháén hóná bahá zurag butagét. ²⁰ Masih cha donyáay
jórh bayagá pésar gechén kanag butag, bale é goddhi róchán pa shomaygi átk o paddar but. ²¹ Cha
áiay wasilahá, shomárá Hodáy sará báwar hast, hamá Hodáy sará ke Masihi cha mordagán
zendag kort o shán o shawkti dát. Paméshká, shomá Hodáy sará báwara kanét o cha hamáiá
ométwár ét.

^a1:1-2 Á wahdá, Ásiáay máná annugén Torkiahay rónendi némag at.

^b1:13 Shehm o rahdári, bezán Ordu o Pársiá “nazm o tartib”, Angrézi “discipline”.

^c1:16 Láwián 11:44-45, 19:2, 20:7.

^d1:17 Ru o ryá, bezán park o dark, Arabi o Pársiá “tab'iz”.

²²Nun ke shomá gón rástiay randgiriá watá pák o palgár kortag o gón yakdegará padelén mehray wáhond butagét, gorhá pa del o setk gón yakdomiá mehr bekanét. ²³Chiá ke shomará nökén zend cha zawl bayókén tohmá narasetag, cha zawl nabayókén tohmá rasetag, bezán cha Hodáay zendag o abadmánén gál o habará. ²⁴Parchá ke:

“Ensán chó káh o sabzagá ent o
shán o shawkatí chó káhay pollá.

Káh o sabzaga merant o poll ham kapant.

²⁵Bale Hodáwanday gál o habar tán abada mánit.” ^e

É gál o habar hamesh ent ke shomará mestág dayag butag.

Zendagén seng o dar chetagén kawm

2 ¹Paméshká, har paymén badi, makr o préb, dotal o dopósti, hasadd o kénagán cha watá dur kanét o hechkaséay poshtá bad o radén habar makanét. ²⁻³Nun ke Hodáwanday néki o mehrabániay támó chashetag, nök péda butagén nonnokáni paymá pa pák o ruhánién shirá shodig bebét tánke cha hameshiá dém pa wati rakkagá rodán bebét.

⁴Issá Masihay némagá byáét, hamá zendagén seng ke mardomán pasond nakort o nazort bale Hodáyá gechén kort o áiyay chammá Issá bémattah o porarzesh at. ⁵Nun shomá zendagén sengáni paymá pa ruhánién lógéay bandagá kár bandag bebét, pák o palgárttagén péshwá ham bebét o anchén ruhánién korbánig bedayét ke cha Issá Masihay wasilahá Hodáyá washnóda kanant. ⁶É hamá habar ent ke Hodáay Pákén ketábá átkag:

“Bechárét, man Sahyunay kóhá sengé éra kanán.

É seng bébahá o gechénién bonheshté.

Á kas ke eshiay sará báwar bekant,
hechbar pashal o sharmendaga nabit.” ^f

⁷É seng pa shomá ke imánó áwortag porarzesh ent, bale pa áyán ke imánesh nayáwortag:

“Á seng ke bánbandén ostáyán ⁸pasond nakort o nazort
hamá seng, bonhesht but.” ^h

⁸O

“sengé ke mardomána thagalénit o
kóhé ke áyán dawra dant.” ⁱ

Áyáni thagal waragay sawab esh at ke Hodáay habaresh nazort. Áyáni ásar o ákebat hamesh at.

⁹Bale shomá Hodáay gechén kortagén bádsháhén ruhánién péshwá o pákén kawm ét, Hodáay jenday kawm ét o áiá shomará cha taháriá dém pa wati porshawkatén rozhnáiá gwánk jatag tán áiyay mazanén kárán jár bejanét. ¹⁰Pésará shomá kawmé naatét bale annun Hodáay kawm ét. Pésará shomará Hodáay rahmat narasetagat bale annun áiyay rahmat shomará gón ent.

¹¹Oo dordánagán! Shomá é donyáyá bégánag o darámad ét. Mani dazbandi hamesh ent ke watá cha á jesmáni lóth o wáhágán pahréz bekanét ke shomay ruháy helápá janga kanant. ¹²Nábáwaráni nyámá pák o palgárén zend begwázénét. Bell toré á, shomará angat bohtáma janant o gwashant ke shomá radén kár kanagá ét, bale gón shomay nékén káráni gendagá, Hodáay áyagay róchá áiá sharap o ezzat bedayant.

Ehtiárdáráni parmánbardáriá bekanét

¹³Shomá pa Hodáwandaygi, sajjahén ensáni ehtiárdáráni parmánbardáriá bekanét, bádsháhay ham ke cha sajjahénán master ent o ¹⁴hákemáni ham ke cha bádsháhay némagá pa radkáráni sezá dayag o sharkerdén mardománi sharap dayagá dém dayag butagant. ¹⁵Hodá lóthit shomá gón wati sharrén kerd o kárán ahmakén mardománi násarpadén habaráni démá bedárét. ¹⁶Shomá ázát ét, paméshká ázátén mardománi dhawlá zend begwázénét bale wati ázátiá hechbar pa radén kárán nimmón makanét, wati ázátiá pa Hodáay hezmatá kár bebandét. ¹⁷Harkasá ezzat bedayét o pa

^e1:25 Eshayá Nabiay Ketáb 40:6-8.

^f2:6 Eshayá Nabiay Ketáb 28:16.

^g2:7 Bánbandén ostá hamá ent ke lögéay bandagá zántkár ent.

^h2:7 Zabur 118:22.

ⁱ2:8 Eshayá Nabiay Ketáb .8:14

báwarmandán hásén mehré delá bedárét, wati zendá pa Hodátorsi begwázénét o bádsháhá sharap bedayét.

Masihay sakki saggagay mesál

¹⁸Oo hezmatkárán! Wati wájaháni parmánbardáriá bekanét o áyán báz ezzat bedayét. Tahná narm o mehrabánén wájaháni parmánbardáriá makanét, trond o zórákén wájaháni parmánbardáriá ham bekanét. ¹⁹Wahdé shomá gón Hodáyá wapádár ét o náhakkén sezáyána saggét, shomay hamé sabr o ópár wat pa shomá sharapé bit. ²⁰Agan shomá pa radén káréá sezá dayag bebét, gorhá chón á sezáay saggag shomará sharapdára kant? Bale agan sharrén kár o kerdey sawabá sakki besaggét, Hodá shomará satá kant. ²¹Shomá pa hamé sakkiáni saggagá gechén kanag butagét, parchá ke Masihá ham pa shomaygi sakki sagget o nemunah o mesálé but ke shomá áiay randgiriá bekanét.

²²“Áiá hech gonáh nakort o
kassárá prébi nadát.”^j

²³Bell toré béezzat kanag but, bale angat ham hechkasi béezzat nakort. Tantaná^k wahdé sakki saggagá at, kassi pátráp^l nadát. Áiá Hodáy sará tawkal kort ke tachkén ensáp o dádrasia kant.

²⁴Áiá wat may gonáháni bár salibay sará wati baddhá laddhet, tánke gonáh cha may delá bemerit o pa néki o páki zend begwázénén, ke shomá cha hamáiay thapp o thórán dráh butagét. ²⁵Mésháni paymá gár o sargardán atét, bale nun hamáiay kerrá per tarretagét ke shomay arwáháni shopánk o sambálók ent.

Jan o mard

3 ¹Oo janénán! Hamé paymá, shomá wati mardáni parmánbardáriá bekanét, tán agan cha áyán yakké Hodáy habará mamannit, gorhá á gón habará na, gón wati janay kár o kerday gendagá Hodáy sará báwar bekant, ²hamá wahdá ke shomay Hodátorsi o pákdámoniá gendit. ³Shomay singár o palgár zaheri mabit ke: “Sará chón begwapén, chónén saht o zéwar per bekanén o chónén god bepóshén.” ⁴Eshiay badalá, wati del o jabiná gón narm o áramén ruhéay páydárén zébáiá besingárét, ke pa Hodáyá é chizz báz porarzesh ent. ⁵Kwahnén wahd o zamánagá anchosh butag o pák o nékén janén ke ométesh pa Hodá butag, watá gón wati mardáni parmánbardáriá singáretagesh, ⁶anchosh ke Sárahá Ebráhémay parmánbardári kort o wájah o masteri gwasht. Agan shomay kár nék o sharr bebant o maylét ke chizzé shomará betorsénit, shomá ham hamáiay chokka bét.

⁷Oo mardán! Shomá ham gón wati janán formehr bebét ke cha shomá názorkter ant. Janén gón shomá zendmánay porbarkatén thékiá sharikdár ant. Áyán ezzat bedayét, tán chosh mabit ke shomay dwá eshkonag mabant.

Rástiay ráhá sakkiay saggag

⁸Néth,^m shomá sajjahén yakdel o hamdard bebét, gón yakdomiá mehr bekanét, narmdel o békebr bebét. ⁹Gón hechkasá badiay badalá badi makanét. Agan kaséá shomará zá o zakat kort, áiá zá o zakat makanét, eshiay badalá pa áiá nékén dwá belóthét ke pa hamé kárá gwánk janag butagét o cha hameshiá shomará barkata rasit. ¹⁰Paméshká:

“Á kas ke zendmánay wáhagdár ent o
wasshén róch gendaga lóthit,

áiay zobán cha badiá dur bebit o
lonth cha makr o prébá;

¹¹cha badiá per betarrit o néki bekant;
sohl o émeni belóthit o hameshiay shóházá bebit.

¹²Chiá ke Hodáwanday chamm nék o pahrézkárén mardomán sakk ent o
góshi gón hamáyáni dwáyá ent.

Bale Hodáwand wati démá cha badkerdén mardomána tarrénit.”ⁿ

^j2:22 Eshayá Nabiay Ketáb 53:9.

^k2:23 Tantaná, bezán hattá, tán é haddá ke.

^l2:23 Pátráp, bezán tahdid, damki.

^m3:8 Néth, bezán godhsará, áherá.

ⁿ3:12 Zabur 34:12-16.

¹³ Nun ke shomá pa nékén káráni kanagá wáhagdár ét, kay shomará táwán dáta kant? ¹⁴ Agan pa shomay nékén kárán shomará ázár berasit, angat ham shomá bahtáwar ét. Cha áyáni pátrápán matorsét o paréshán mabét. ¹⁵ Bass, wati delá Masihá Hodáwand bemannét o hamáiá sharap bedayét. Agan kasé shomay ométag sawabay jostá bekant, modám pa passaw dayagá tayár bebét. ¹⁶ Bale é kárá gón narmi o pa sangini bekanét. Wati jabin o wejdáná pák o sáp bedárét, tánke shomará bad o rad gwashagay wahdá, á mardom gón shomay nékén Masihi kerdáray gendagá cha wati zá o zakatán pashal o sharmendag bevant. ¹⁷ Paméshká, agan Hodáay razá bebit ke sakki besaggét, gorhá badén káráni sakkiay saggagay badalá, nékén káráni sakkiá besaggét. ¹⁸ Masihá ham yak baré pa may gonáhán sakki sagget, bezán á “Nék o Páká” pa gonahkárán wati ján nadr kort tán márá^o pa Hodáyá sar bekant. Masih jesmi koshag but bale Ruhá zendag kort.

¹⁹ É, hamáiay Ruh at ke bandigén arwáháni nyámá shot o pa áyán járé jati, ²⁰ hamá arwáh ke gwastagén zamánagá náparmániesh kortagat, bezán Nuhay zamánagá ke bójig addh bayagá at o Hodá gón sabr o ópár wadárig at, bale kammén mardomé, bezán tahná hasht mardom cha ápay ráhá rakket. ²¹ Hamé áp shomay pákshódiay mesál o nemunah ent ke annun shomará rakkénit. Pákshódi jesm o jánay zaheri chellán páka nakant, é pa pákén wejdán o jabiná gón Hodáyá shomay dazbandi ent ke cha Issá Masihay jáh janagay wasilahá shomará rasit, ²² hamá Masih ke ásmáná shotag o nun Hodáay rástén némagá neshtag o préshtag o zór o wák, hamáiay dastay chérá ant.

Gón Hodáyá wapádári

4 ¹ Nun hamá dhawlá ke Masihá wati jesm o jáná sakki sagget, shomá ham pa anchén káréá tayár bebét, parchá ke har wahdá kaséá mán jesmá sakki saggetag, cha gonáhá rakketag. ² É paymá, nun á wati mantagén jesmi zendá ensáni lóth o wáhagáni sará nagwázénit, Hodáay wáhagáni sará gwázénit. ³ Shomá bázén wahdé hamá káráni sará gwázéntag ke Hodánábáwarén^P mardomán dósta bant, chó ke badkári, hawá o hawass, hanósh o bésári, sharábwáriay mahpel, aysh o nósh o botparasti ke gandahén káré. ⁴ Nun wahdá á gendant ke shomá é radén káráni hár o hirrótá áyáni hamráha nabét, hayrána bant o shomará bad o rada gwashant. ⁵ Bale é mardomán hamáiay démá jwáb dayagi ent ke pa sajjahén zendagén o mortagénáni dadrasíá tayár ent. ⁶ É dhawlá, Hodáy wasshén mestág pa mordagán ham rasénag but, ke sajjahénáni dhawlá áyáni jesmi dádrasi butagat, tánke arwáhesh Hodáy paymá zendag bemánant.

⁷ Donyá zut halás bayagi ent, paméshká gón shehm o rahdáriá watá grán o sangin bedárét tán dwá kort bekanét. ⁸ Cha sajjahénán masterén gapp esh ent ke yakdomiá pa del o setk dóst bedárét ke mehr, bázén gonáhéay bakshagay sawabsáza bit. ⁹ Bé norondhagá wati lögay dapá pa yakdomiá pach bekanét. ¹⁰ Shomá har yakkéá cha Hodáyá hásén twáné rasetag. Amánatdáráni paymá, Hodáy tahrén nyámatán pa yakdomiay hezmatá kár bebandét. ¹¹ Kasé ke habara kant, Hodáy jenday habarán bekant o kasé ke hezmata kant gón Hodáy dátagén zór o wáká hezmat bekant, tánke Issá Masihay wasilahá Hodáyá satá o saná berasit. Sajjahén shán o shawkat o zór o wák tán abad hamáiay bátant. Anchosh bát, ámin!

Issáay sawabá sakkiáni saggag

¹² Oo dordánagán! Cha hamá ásén chakkás o ázmáeshán hayrat makanét ke shomay chakká kapant o wati delá magwashét ke: “É ajabén káré gón má bayagá ent.” ¹³ Tán ódá ke gón Masihay sakkiáni saggagá sharikdár ét gal o shádán bebét, tánke hamá sáhatá ke áiay shán o shawkat paddara bit, shomá ham wassh bebét o békesás shádmáni kort bekanét. ¹⁴ Agan Masihay námay sawabá shomará zá o zakata kanant, shomá bahtáwar ét, parchá ke Hodáy porshawkatén Ruhá shomay delá jághah kortag. ¹⁵ Watá pahrézét ke cha shomá kasé hóni, dozz, radkár o pléndh bayagay sawabá sakki o sóriáni tahá makapit. ¹⁶ Bale agan kasé Masihi bayagay sawabá sakki o sóriáni tahá bekapit, cha eshiá pashal o sharmendag mabit o pa wati Masihi bayagá Hodáyá satá o saná bekant. ¹⁷ Nun dádrasiay wahd átkag o é dádrasi cha Hodáy hándán o kahólá bendáta bit. Agan dádrasi cha Hodáy hándáná bendáta bit ke má én, gorhá á mardománi ásar o ákebat ché bit ke Hodáy wasshén mestágay namannók ant?!

¹⁸ “Agan pahrézkárén mardoméay rakkag chó grán ent,
gorhá nábáwar o gonahkáráni hál ché bit?”

^{o3:18} Lahtén syáhagay tahá átkag: shomará.

^{P4:3} Asligén Yunáni nebeshtánka gwashit: “darkawmén”.

¹⁹ Paméshká, á ke gón Hodáay razáyá sakki o sóriáni tahá kaptagant, watá may jórh kanókay sepordah bekanant ke wapádár ent o nékén kár kanán bebant.

Hodáay ramag

5 ¹ Man wat ke cha kelisáay kamáshán yakké án o Masihay sakki o sóriáni sháhedé án o áiay paddar bayagién shán o shawkatá sharikdár án, shomay nyámá harché kamásh hast, cha áyán mani dazbandi esh ent ke: ² Hodáay ramagay shopánki o cháragá bekanét ke shomay sepordah kanag butag. É kárá pa nádelkasshi makanét, pa del o setk bekanéti hamá dhawlá ke Hodá lóthit. Gón hobb o hodónáki bekanéti, pa wati jenday nap o puttá makanéti. ³ É ramagay sará wájahi makanét ke shomay dastá dayag butag, pa eshiá sharrén mesálé bebét. ⁴ Padá wahdé masterén shopánka kayt o paddara bit, shomá shán o shawkatay hamá tájá katthét ke hechbar gár o zawa lá nabit.

⁵ Oo warnáyán! Anchosh shomá ham wati masterénáni parmánbardáriá bekanét o gón yakdomiá békébr o darbésh bebét, chiá ke:

“Hodá porkebr o gorunákén^q mardománi démá mohra óshtit,
bale békébr o darbéshén mardománi sará wati rahmatána gwárénit.”

⁶ Paméshka, Hodáay porwákén dastay chérá watá békébr o darbésh bekanét tánke á, wati gisshéntagén wahdá shomará borz o sarperáz bekant. ⁷ Wati sajjahén gam o paréshánián hamáiy sará yalah kanét, parchá ke áiá shomay hayál gwar ent. ⁸ Grán o sangin o hozzhár bebét, chiá ke shomay dozhmen, Shaytán, chó shérá gorrán ent o shóházá ent ke kojá shekáré berasiti tán bederrit o éri bebárt. ⁹ Shaytánay démá bóshtét o wati báwará mohr o mohkam bedárét. Bezánét ke hamé paymén sakki o sóri jahánay é dega jágahán ham shomay brátáni^r sará bayagá ent. ¹⁰ Nun Hodá, ke sajjahén rahmatáni málek ent o shomará cha Masihay ráhá dém pa hamá abadmánén shawkatá gwánki jatag, shomay kammén sakki o sóriay saggagá rand, shomará nóksará twána dant, mohr o mohkama kant o páydári o zóra bakshit. ¹¹ Wák o kodrat tán abad hamáiayg bát. Anchosh bát, ámin!

Goddhi habar

¹² É gwandhén kágadon gón Silwánusay^s komaká nebeshtag, ke áiá wapádárén bráté zánán, tánke shomará delbaddhi bedayán o gwáhi bedayán ke Hodáay rahmatáni hakkén ráh hamesh ent. Hamé ráhá mohr bóshtét. ¹³ Cha hamá bánokén goháray némagá shomá sajjahénán drud o drahbát sar bát ke Bábelay shahrá ent^t o gón shomá hór gechén kanag butag. Cha mani chokk, Markásay némagá ham shomará drud o drahbát berasát.

¹⁴ Gón pormehrén chokkagán yakdegará drahbát begwashét.

Shomá sajjahénán sohl o émeni sar bát ke Masihay arwáh o jabiná ét.

^q5:5 Gorunák, bezán magrur.

^r5:9 “Brátay” máná har báwarmand ent, mardén o janén.

^s5:12 Silwánus hamá Silás ent ke Kásedáni Kárav ketábá ham áiay nám geraga bit.

^t5:13 Bábelay shahrá bánokén gohár, Bábelay shahrá kelisá yá Rumay shahrá kelisá buta kant.